

湘綺樓全集

目錄

卷一

賦

卷二

奏疏

上書

卷三

論

議

序

卷四

頌

箴

銘

卷五

傳

卷六

誄哀

祭吊

碑

卷七

墓志銘

卷八

行狀

湘綺樓文集目錄

卷一 賦

哀江南賦

用庾子山舊韻

愁霖賦

并序

弔舊賦

并序

上征賦

會試萍始生賦

牽牛花賦

并序

詡哈密瓜賦

并序

卷二

奏疏

上書

擬李鴻章陳苗事摺子

陳夷務疏

上巡撫惲侍郎書

爲羅運使勳上曾總督書

文集
與曾侍郎言兵事書

與盧生書

與李少荃書

到廣州與婦書

沛南寄婦書

上張侍講啟

卷三

論議序

御夷論一

御夷論二

常文節祠議

論語訓序

莊子注序

墨子校注序

老子注序

題鵬冠子

代豐春秋例表序

六書討原序

王兵備詩集

八代文稗序

巫山天岫峯詩序

秋醒詞序

穀梁申義序

衡陽縣志序

湘潭縣志序

桂陽州志序

尚書太傅序

蕉雲山館詩文集序

卷四

頌 箴 銘

桂頌

并序

巡撫吳尚書六十壽頌

嚴通政庶母任氏壽頌

并序

女箴

并序

影山艸堂銘

珍珠泉銘

并序

卷五 傳

李仁元傳

儲玫躬傳

陳景雍傳

鄒漢勳傳

丁銳義傳

羅熙贊傳

郭新楷傳

嚴咸傳

黃澶熙傳

陸建瀛傳

今列女傳

卷六

哀誄 祭弔 碑

黃司使誄 并序

羅季子誄 并序

王祭酒母鮑太夫人誄 并序

丁文誠誄

余世松誄 并序

彭壽頤哀詞

莫姬哀詞

帥芳哀詞

嚴伯受甫哀詞

弔宋生文

祭常都尉文

衡州西禪寺碑

詔建定興鹿壯節祠碑

清故湘潭縣學附生王君之碑 并序

曾孝子碑文

皇朝追贈總督銜調任山西巡撫湖北巡撫諡文

節常公神道碑

衡陽常氏家廟碑

振威將軍武提督碑

巫山神女廟碑

王仲章碣

兄代功撰妹滋書妹璫篆額

曾孝子妻嚴氏靈表

管太宜人吳氏神誥

永興教官賀君墓表

龍中允妻熊氏墓表

卷七

墓志銘

采芬女子墓誌銘

皇朝追贈布政布銜子謚忠壯記名湖南道員鄱

陽黃君墓志銘

鄧太夫人鍾氏墓志銘

常文節妾蔣氏墓志銘

張祖同妻周氏墓志

贈太子太保兵部尙書世襲一等輕車都尉剛直
彭公墓志銘

皇贈侍郎賜祭葬炎祿大夫貴州布政司使王君
墓志銘 并序

振威將軍張君墓志銘

皇中憲大夫候官陳君墓志銘

瞿學士妻吳氏墓志銘

李編修妻郭夫人墓志銘 并序

慈谿令秦君墓志銘 并序

張安化妻錢氏墓志銘 并序

常儀庵先生墓志銘 并序

皇清誥授

榮祿大夫
振威將軍

故兵部侍郎都察院右副都

御史巡撫安徽兼提督奇齊葉勒特依巴圖魯

唐公墓志銘

并序

蔡夫人墓志銘 并序

皇清誥授中議大夫彭君墓志銘

皇清誥授中議大夫衡陽程君墓志銘

皇清例贈文林郎王君墓志銘

蔡毓春撰

陳永豫墓志銘

鄧氏大姊王娥芳墓志銘

妹滋撰

皇授光祿大夫兵部尙書右都御史雲貴總督

贈太子太保予諡愷慎劉公墓志銘

并序

卷八

行狀

長沙攸縣慶都龍君季七十六行狀

誥授光祿大夫太子少保兵部尙書詳勇巴圖魯

世襲一等輕車都尉 欽差巡視長江水師

贈太子太保衡陽彭公季七十有五行狀

桂陽直隸州泗洲砦陳侍郎季六十有九行狀

陳侍郎側室李恭人行狀

旌表節孝晉封太夫人衡陽程太夫人萬氏季八

十有七述狀

湘綺樓文集卷第一

長沙湘潭王闓運字壬父撰

賦

哀江南賦

用庾子山舊韻

懿

皇圖之肇夏奠九有而分官制幽燕以疆榦控江淮而
鎮瀾蒸重熙以慈馭祀二百而孟安惟

聖人之紹興軼啟丁而嗣主德希盛於黃農賢夢求於
方虎屬巖荒之潛滋被含弔而蠢聚伊有苗之弗靈方
象荆於虞祖始賜旄而申伐期竝綏斯敷土臨時雨而

出師望南雲而開府尙書舊望忠殫貞竭與疾蒙瘴乘
宵馳節方霜厲而雲騰嗟霧墮而風烈馬伏波據鞍而
不歸羊叔子登山而樹碣哀此偉人傷茲部民陽沈掩
幙雨泣攀輪

天題表石史筆刊筠旣傷一老申命元臣輶車屬於象
郡組練燿於灘濱瞻高軒而起鳳持繡佩而分麟歎師
燿而屢折終論帥之無人元始開經之歲永和修禊之
年道極周而不返屯急難而思賢

天子宵衣罷食將軍武帳開筵占狼星而望氣翦鶉首
而欺天長虹暮直小月塲圓棘門霸上之軍執冰而弛

仗勅稜棘矜之士因利而控弭藩籬無合肥之戎將帥
無苟噐之武險旣失於陰平道遂通於子午部曲參差
齊盟狎主羽林執戟期門聽鼓俱雁行於道路錯犬牙
於檐魯尉佗弓及於長沙南郡舟回於江浦始開壁而
臥牆信墮墉而鑄柱於是人空千里楚亾三戶鬻角連
圍鳶書落羽火城晝斷梯衝夜舞垣臨壞色之雲天少
洗兵之兩湘水騰波艷國無事援屯救趙之軍車返至
吳之使四郊無辱於大夫三軍不謀於元帥燕賀堂淡
魚游釜沸爛羊有關內侯封授粟有隴西都尉廬江車
馬揚州笙樂歌豫章之篇講石頭之學文雅風流簪裾

花落負其天塹忘其犄角影纓者坐致公卿揮塵者羞
談管樂豈知山川黯黹戎師遠畧攻卽墨而不下望楚
師而氣索遂開網於前禽迺落帆於黃鶴奔騰而班馬
羣驚蹴踏而洞庭波濁洎日躔之在尾剗武昌之高壘
米無陶侃之船炬絕都官之雉防開地道兵虛背水重
鎮之忘忽焉諸侯之師搖矣方天下之全盛無蒼生之
繫命閭艸木而驚弓秉權衡而失鏡怙其高下之心守
其優柔之性遂使謀同築室功無反正當凶徒之收卒
值時事之可爲險鹿非寸鋌之所制奔駒非朽索之所
縻方脣亾而寒齒嗟毛傳而無皮隘空設險都不彊枝

潯陽之長蛟浪激橫江之六鷁風吹下縱陽而振穉逼
金陵而俯窺時則督師奔北元戎脫胄揮羽扇而潛逃
捧金甌而忽漏泣孤城而喪氣登山頭而望寇同馬謖
之畏虎若牛兄之遇獸虜無頓刃楯窮棲宿廟絕龍生
市虛犬鬪大都淪覆妖氛橫扇百里金墉千秋舊甸蕩
橫流於滄海愴陸沈於中縣十萬橫戈三千被練莫不
擁刁斗而酣眠勞牲牽而歡宴有甯州之裂帟無燕師
之飛箭秦堊父之登縣夙沙衛之奔殿不聞笠鼓之驅
坐觀臺城之變逋寇高張王師不戰竟成白馬之謠虛
數闔城之扇三舍交綏十里長圍上游烽落舊壘灰飛

廬州再建淮揚分裂豫章與鄰屏藩心折智急嬰城謀
疏鑿轍非墨子之併厖等酈生之掉舌文牛蔽甲而歸
林封狐假威而憑穴秦士會之夫婦分離羅企生之弟
兄泣別郡少堅城官希全節鯨鯢奔涌烽煙冥滅南昌
勝區崇墉勢壯險失江防謀資楚將樓上琴彈沙邊籌
唱焚郭相驚全師不喪列縣淪亾高秋恨愴九江浪急
漢水波長濡須不守夏口空防桑落有敗軍之地西陵
無太守之牆兩軍再北半壁云亾始則齊將漏師都軍
不發有返旆之叔敖無入軍之周勃轉餉齎糧厲兵蒐
卒未當一面屢營三窟不聞裹革之尸匪有封侯之骨

智小憂多身存名歿或以健鬪彰威虛聲久假地隄名
都陣分平野暫起李陵未當毋寡惟萬里之奔命猶三
城之不下桂林告急將軍躍馬備同羊侃之城氣振武
安之瓦臨湘蒼黃危巢不覆桓桓總兵功齊踣鹿壞壁
崩積危陽驂黷巷哭同冤天痛怨酷辰州忠壯義聲方
睦氣激當關心雄轉軸豫章守禦謀漢計熟方伯奉符
尙書壞屋遂成申子之名用報涑源之哭且夫傾危顛
沛崎嶇邊塞仗節專城分符儼對風疾草勁途窮駕稅
鑿白水而無慚豈青蠅之所礙濟長風之巨舟尊砥柱
於中游彼張翥而冒刃實代遠而芳流惟全州之死守

屹臨敵之孤樓身甯碎玉谿不同丘倡創羸而振臂聯
胡越於方舟未成功於祖逖方授命於周侯檣舫石鐘
之岸旋船楊葉之洲惟副戎之高節鬱劍氣於斗牛總
督方裴回歧路數騎斜趣泣諫牽裾扣舷阻渡徒聞屈
子之沈終失雷池之戍朝服投江高名遠樹濟源文梓
饒民所恃路絕外援命寄百里蛇矛失盪龍淵躍水壯
士喪元一門同死合州繼陷大難又始江子一方誓於
碎身楚申鳴無慙於筮仕哀此數人光於國史運慕傳
燮之求生愧陸機之入洛崎嶇戎馬飄零無託始溥游
於彭蠡悵秋霜之早落方孟堅之撰征傷閒道之離索

幸生還而渡津返故國而掩扉羨班超之投筆歎李廣之單衣方其追逐嵇王載酒山陽時清鑄戟坐戒垂堂江湖平鏡行旅連檣論王褒之講德陋宗慤之渡江楚中桓梓江左葛王莫不雍容文翰希風洙泗履舄交酬笙瑟閒至鏤鄒爲不祥之金禹鼎皆不逢之魅六師無戒於張皇天馬不求於幽冀醴酌衢尊鑑徵欹器三五季中一敗塗地東西交騁於軍書南北惟通於兵氣廟算憂勤生民殄瘁於是公卿甲第滑川園圃月榭栢重雲宮寺古煙空彩鳳之樓薪用盤龍之柱等阿房之一炷傷郿塢之枉聚訪名士而問夷吾入隆中而求葛

亮繫處士之虛聲言空高於古上驅頓同奔窺園久曠
元龍多問舍之談小艸無出山之望空陳玉軸之書詭
答顧琰之仗奉北闕之絲綸閔西疇之寔勤獲婦姑之
麥勞疆場之臣禾桑坐槁守望非眞流亾飢饉殲我農
人蕩子從軍關山已遠高樓思婦春閨已晚宋宋庭前
音書悄然夢中鼓角別後珠鞭望女子之氣無津吏之
船自我不見同歸百年披堅執銳舍生雪恥或同義萬
家或獨標干祀氣憤外綏餒平旬始將無全策謀無知
已臨易水而悲歌風蕭蕭其去矣况復魯難未已楚師
方起彼凶桀之構禍憑封豕於句吳更驅散卒實召狂

徒銜刀直渡義旅中渝未建法和之剎方飛張角之符
尋干戈而自縊繫徽纆而待誅俄驚趙幟終棄漢弧王
導取飄零之舊節武昌爲蕭瑟之空都時事急難滄桑
萬端怨亾羊而已晚累素鼓而求安湘妃樹赭夢澤雲
殘發南轅而俄返通東道而猶難奔軍亂轍斫吏探丸
靖州之中宵受檄匹馬犯寒土沈碧血骨葬青山猶得
堅陣再摧名酋遂殞羌平則器失虞公狄敗則元歸先
軫驚馬鳴哀黃巾氣盡笳空卻敵酒不消寃彼乘時而
岌岌旋因壘而言言潭州劫急湘水師屯徒聞棄甲莫
下縣門竟發盧循之矢方齊王濬之船戎師驟勝敵人

開戶卷甲疾馳馮河搏虎營軍列於梁澁樓船臨於陽
浦射鷲隼而登墉獲雄狐而遇蠱全其半局支於一柱
然而湘南大邑楚服名城披茂草而求周道折細柳而
問長營出蒼鷺而識亂見海鳥而知兵索靖之言旣驗
田單之族未行烏夜嘯而轉急狐晝見而猶鳴落日傷
心之地悲風巷哭之聲長星之光燭天千里之血在地
問石城之重兵繫瓜步之纍帥護軍肩解蒼鷹翼攢圖
南之志未窮向北之波轉沸效杞侯之大去等申胥之
垂淚加呂武陵舊涇黔中隘陘劔及秦人之洞輪埋刺
史之亭朝逐賈生之鵬暮隨閔貢之螢桃源浪白澧浦

煙青轟然并泮遺民盡散半夜雞荒空江星亂明月孤
城寒沙遠岸身危於潘岳神傷於荀粲瞻兄有行路之
謠望子有登山之歎縣渺關河浮萍逝波紅粉之樓遂
圯燕支之色無多感匏瓜於洛浦思織女於天河杞梁
妻之新曲伯玉子之哀歌別有遇馬前之箠輕亭刃之
威心高力弱節壯身微碧塗容而愈烈丹染轂而無歸
託文鴛而卽化指孔雀之南飛厲此貞運當茲道否厲
爲階而至今夫誰尸其禍始渤海政衰潢池盜起初發
難於一隅乃患延於五祀鷹鷂爲今日之良臣鰲鶴乃
當年之君子楫路將窮鼓聲多舛鬼躑躅於北邙人蕭

條於東市友紀未喪窮寇終亾稟當陽而奉討卜周室
之再昌願淡思於設險儻無棄於姬姜尊主之隆歸於
賢方伯六師之盛思乎古明王王室未安諸侯釋位胡
南風之不競更江東之全棄謀士固聲勇夫喪氣豈豐
戾之當盈何眾人之皆醉余以蓬戶宋寥斗室回旋身
世悠悠秋風感焉歎英雄於廣武策天人於廣川壯風
雲而方起與日月而代遷耿弇小兒之意張纘早達之
幸悲歌當泣離騷問天況以友朋離別前游渺然盛固
難紀憂殷方始不望貂蟬惟增馬齒或杖策而從軍及
攜琴而歸里昔之長嘯蘇門時復飲酣都市文無淵明

之賞門絕儒冠之士王敦如意之詩孫盛陽秋之史若
使小年詞賦猶有好事楊雄江表文章豈直窮愁庾子
昔庾子山漂泊江關哀時多難作賦一篇以發牢
落之思至今盛傳於世文詞美矣洪逆之亂禍延
七省按其地分皆古江南余才愧昔賢親逐戎馬
雖無典午之達亦免南冠之窮多暇抽思殷勤屯
筆乃爲新製竊用舊名旣以江南冠題故淮北山
東皆不列入卽此數省傳聞亦異維桑與梓頗述
其詳以貽哲工鑒焉甲寅歲七月記

愁霖賦

并序

仲宣初客荊州景升以文詞見畜中原多故羣雄還
進荊州據上流之勢季穀順成積備既饒主人無遠
略之志坐時寢日歲月如流既爲登樓賦以寄其悲
會春霖移月勝覽斯絕一時鄉盡拊序惕中夜聞雨
聲慨思交集乃作愁霖賦以見志其詞曰

登南樓而四望兮層陰蔽於崇北雷隙濩以疏聯兮瀉
潦浸於周陬淹五旬而彌霖兮歷春夏而方稠義仲失
賓於岵夷豐隆扶寸而岱幽皇浩蕩其難知兮夫固非
下土之所誣于是元界改儀靈媪淳淵八柱損高天池
謝川媮夫坐吟思女長歎谷推脩脩高椅曠薦飛鷹率

陵而不揚離獸求穴以自安黑蜮夜喜白躡朝奔吹無
象之不移亦何情之靡遷倚高軒而恍恍竟旦夕而忘
言徒愁視而悲聽神索索而如昏客有過者見其若此
也將發敗芒之瘴據幽悒之情敷衽而前稱曰方今八
州從橫一隅宴清方伯揖客上館延英抱器者麇集懷
瑜者鱗盈桴候無警江河珉平帶甲跨郡儲糧峙京衢
歌巷舞鳴匏吹笙足以作避世之大礪謠樂國之化成
子以幕府之上士冠南州之盛聲奏才則雲蔚高談則
雷驚曳珠履挽緜纓陪文燕飛雅觥然而色悄悄而若
愠意蕭蕭而不勅豈智者之多慮抑亦善懷之有行乎

仲宣乃儼思而若忘不自知其前席謝上客之見存
馘余之鄙臆天道回旋兮陰陽代息箕範衍政兮雨暘
恆休咎徵上旻兮時則有尤萌昧其然兮哲察其由
鞫遷惟人兮豫慮而求穆悲黃竹兮旦感敦瓜淫霖爲
災兮自古由嗟矧文士之易悲方旦莫而咕噓將非物
而自擾兮況茲感之獨深庭草靡兮無榮昔邪緣兮垣
陰步廣欄而踟躕兮還空堂而騷駝信詩人之思晦兮
雞膠膠而不已貞余度之嬋娟兮羌獨儀乎君子日月
坐此銷鑠兮夜漫漫其何已慕行國之寫憂兮瀟余車
而自梶凭前軒以長想兮見四封之若姪漢滔滔而東
奔

兮荆山崩剝於其北南襟衡而隘冥兮西割吳以膠粟
指三戶之暗淡兮溼爨煙而罕發波湯湯而襄陵兮悲
王土之日窄車輪載於仍陰兮又關市之彊索農輟畝
而買刀兮固惟戎之是服悲華黍之既廢兮胡三季之
是積畏斲石之涉波兮常非霜而自粟葵傾陽而違光
兮雖寸心其徒設甘絕根于谷底兮怨暎暎之莫及連
率方以尊俎爲雍容開爽塏而自居燕依幙以頡頏忘
鳴鳩之卒瘡案龍劔而自飾兮猶不以爲履苴徒假日
以泄泄兮忘謹度以戒虞公孫偶人兮天府以亾夥涉
勝秦兮沈沈其宮莫敖三勝兮荒谷被刑楚靈復陶兮

投車悼傷彼建國之猶固顧一敗而不隆譬枝葉之非
害胡撥本以自窮今茲野無嘉苗室無餅儲民狃于豐
九穀錙銖夫災沴生于無朕雖堯舜其猶病疇惠君而
能逆奚狂夫而知儆九府之圖國廢其資天不我將委
命其誰兵凶連延兮聖老所悲媿婦泣周兮余實自哀
客聞斯言抵掌伊嚶曰吾子之所懷信侘傺而多勞蘊
臧文之聖智兮殷杞人之所憂夫庖人之不言兮非尸
祝之所代龜玉之出匱兮彼有司其毀敗代匠斲而必
傷兮又況斧柯之不存徒煩寃于咫尺兮忘禍福之有
根邑犬之吠兮眾所怪也曲突之早謀客之害也賜履

之愴兮風牛其左鞭兔伏箱兮其又奚可使弱可輔兮
何爲平山樞一丸封關兮聵識其誣徹葷救鹹兮固亦
無端方州敵愾兮胡獨好難日月愉愉兮天與其安萋
叔違之兮藏血遂寒奚不以趙孟之偷時考遺跡于信
陵召侍狎參羅繒傾桂醕羞燔鬻樂太康之滔滔醉祈
招之惛惛嗟歲逝兮不我與樂既往兮憂駸駸章臺旣
已傾秀士又已亾忽焉千齡兮麗牲所傷烈士歿名兮
其謀不長嗟彼是而忽思兮振古已然柏舟不飛兮子
尙何怨諺言信其有徵兮彼長人其撻天何自爲其不
廣兮心夢夢而惛惛且夫日不可翫故多暇者身不彊

時不可爭故首福者命亦殃彼商蘇與荀季固順天而
歆揚嗟尼北與孟里乃違運而自彊信大德之不凶全
哲身其未創尙胡悲于迤蹇斯自貽其遑遑獨不見非
時之麟定出始厄于鉏商彼豎子之微斤噫聖仁其必
傷皇假象以告文故反袂而浪浪子何爲兮耿介蘭未
燒而荷芳德方賢而稊微志婞直而自臧昧羊舌之優
游蹈龔生之忼慷同元龜之神夢徒自劓于明王憚人
犧之實難雖尾斷而距行仲宣于是絕才翳慧收視反
聽深悟默存詎宋晞窳慕虛丹之無磯匪彊梁之可諍
聊乘化以推移每外交而奚聘旣無悅于龍翔亦何憎

于鵬鷲朝彈絲而歌商音淵淵而如磬夕澗寐而寤言
考子槃于獨醒亮大化之不迷何煩憂于外景彼感時
而悼季豈達人之所命余以身心爲策兮大鈞爲輪四
時爲馬兮百季爲旬乘吾震兮止吾坎夫固隨所遇而
無屯彼他人之成虧與斯代之危安非私身之通塞胡
勞心而日詢豈爲一葉而遂秋兮愛孤華而早春乃沾
沾以自戚兮良造化之所瞋高陵爲谷兮漁父無悲滄
海爲田兮樵蘇又奚疑宜各委其不豫而弗奸人之所
私回志從元兮心不疑明天照兮因是非固經世而不
辨矧六合之渺瀰處不材而全身終玩世而歎衰歌伐

檀兮三歎信河淪之無時反陋室而日冥獨抱道而衰
回

弔舊賦 竝序

丁巳過長沙將有所感而物附之乃援筆成文詞不
加點語恍惚而無端意寥空而無極亦騷之遺也遂
題爲弔舊賦其詞曰

夫何頎媚之令姿兮眇修度而莫尋委朝華而就穉兮
信游木之空陰扳遺柯而泣露兮槁移柳于漢南悟非
秋而自荅兮感迅湍而赴侵震餘言之未達兮留嘯鳥
以告音告余音之不存兮危余心而餘補望衡門而儼

開兮臨中唐而回步苔文石而從橫艸無次而當路若
余心之失端亮離離其難緒入悵悵其忽忽出步步而
依依始循階而永歎旋望室而知非下玉墀而微吟凭
青瑣而不開昔往往而逢君今何俾余之獨歸旣音塵
之永絕逝非星之莫追白日兮的的浮雲兮霍霍步欄
兮翼翼方池兮澹澹晨雞兮時鳴乳燕兮翔翔彼雖經
而猶故夫安知余之所感覽外物之未遷將羣憂而自
擊蕩夕陽之飛陰悅余聽夫錫簫成春服而偕嬉妙華
齡于右髻聲宛宛而猶尋季冉冉而遂迢固之子之猶
少胡先春而遽凋況余生之及壯懼芳菲之易漂雖鷗

鵝之不鳴信日及之戀條人閱世以送季情緣事而爲
夢方千歲而必消促一夕其何痛彼柏悅而蕙歎匪忘
情之所用愧學道之未能慄哀心而一送儻願影而同
趨亦何悲之獨重重吾心之幽耿甯可喻于繇詞惆良
媒之未安實佳人之我欺曰非咎之在予將託恨于疇
伊將引譽以自尤又非意之可期告重泉而猶難矧覲
問之狐疑申禮防其必峻詎目成之汝貽弭旣孤而必
絕心已獨其必傷辭慈母之界思甘歸身于九壤靈便
慧以自如脫煩寃而鶴翔忽戢翼以下臨見幽室之孤
光愴令心其眷眷庶變婉而旁皇余亦舍而永訣恨再

至其無由旣懷愴于無窮將卒歲以優游捐君佩于湘
潭絕余襟于秦北永百載而不尋奚華屋之能壽過高
門而無顧羌垂涕而自收

上征賦

惟咸豐之有八兮

詔集士而待試羣彥企于嘉會兮吾亦從眾而赴期出
里門而涉涓兮夕杖策于雨湖聞海上之異警兮初攀
轡而踣曙惟進取之有時兮彼馳騫其安適指長沙而
遄回兮覲一覲乎賈策伊左卿之負聲兮宜憂近而慮
遠顧豫防之無患兮寄一匡于微管管越竟而攘狄兮

左空國而待夷雖乘權之異時兮知其志之不恢亮宏
謨之無望兮諷出位之多思旣侘傺于桃殽兮悵憑心
而忒之乘復陽之良辰兮吾友告余以並駕日曖曖而
將雨兮及石馬而託舍懿尹公之仗節兮固吾圉以成
城奄倉皇而喪元兮信雖敗而猶榮方寇騎之長驅兮
眾恬怙而無備民趨市而內兇兮將張弩而外蹙苟交
綏而圖利兮彼躡蹤其數闔厲結纓以寄命兮揮魯戈
以爲邊驂雲積于四隅兮暗干鼓而不鳴驚風怛此荒
瓦兮陽慘慘于故營胡邦人之無澤兮廟祀闕而無託
彼興心以競炎兮亦疇弔此零落江羅夙而赫奕兮瞿

鄧沒而無祭同功施而異報兮雖忠孝其猶藉勢屯余
車于醴陵兮想王喬之所居瞻陽歧而息心兮誦止觀
以冥虛過甘祠而憑軾兮指湛橋而私哂嗟世亂之識
忠兮陋一第之自窘道袁臨之列城兮遺黎語乎蕭劉
感戴侯之鄉兵兮信指蹤之勝籌藩四國以維城兮若
蟲蟲之思仲委雄畧以待援兮詫南人之獨勇寇兵固
其循環兮幸飢鷹之飽颺鮮亾羊而補牢兮又剜肉而
醫創消劔光于豐城兮就嬰池余將洗馬溯梅徐之高
烈兮希嗣塵之終寡眷舊游于六秋兮寶澹漾而無羈
知交忽其凋喪兮尚何惜滕閣之卒積指南浦以懷人

兮各邁亂而蔽處壯江鄧之墨守兮固異趣而同武豈
守羸而戰絀兮懼挫鋒而民訶悲禍生于蕭牆兮乃露
刃以反弓昔文成之禽濠兮惟一戰以奏捷逮移師以
討寇終不靖于藤峽彼一人之經營猶難易之相遠火
易熸于方炎艸難圖于滋蔓眷風塵之漫漫觸余思之
眈眈欲少留此東湖兮閱流波而增愁緬長路其猶遼
兮命僕夫吾脂軸吾友旣婆娑而見鞿兮行涼涼兮怨
阻出西城而攜手兮指高墉以告予昔人譏夫城郢兮
恃登陴以自嬰顧下策以扞民兮子無謳夫漆城勉從
命而趨礮兮愧陶督之綜密咨土木之爲灾兮余懼慙

以冒責信塵網之廣張兮與子憇乎冥鴻就西塔而分
道兮渡武陽而濯纓慕叔倫于棲賢兮將回驂而不可
仰王謝之高風兮夕余宿乎汝左踐文橋而拂霜兮見
荒垣之言言合兩軍而雷攻憶李生之出湓選文士以
典兵尙詩禮之敦說胡腹心之不謀各競志而異節旣
雁行而峙嶠兮眾懷難以塞胸嗟否臧而輿尸兮殲我
良兮耿林耿林旣授命兮憤義師之解甲苟戎馬之軼
疆亦何術之可挾茲寇昏其非狡兮非吾壘之難犯平
原衍其百里兮余竊危其無險路英巨而左轉兮渡昉
川而聊渴徑回復以嶮峭兮悅松竹之冬媚何建昌之

偏屯建旗鼓於窮阿望閩越以備邊愁將帥之蹉跎聽
吹螺而夜興悲涼月之映沙燭閭閻以鄉晨哽吾弔夫
三河慨成功之在天兮惜投閒之將老余既不倫於琨
逖兮亦安用此佻巧且隨流而平進兮奚蠱上之足慕
揖華岡而請辭兮俯雲林而遵路徑金谿而直指兮惻
廣廣之橫術披積牆之長蒿哀寡妻之鶉結遭亂離其
亦多兮獨茲邑之靡遺重旅懷之幽憂兮溯寒風而涕
洩驚怪峯之峻嶒兮知貴溪之藏育彼道陵之遺洞亦
豈重于圖籙包詭誕而容九流兮實

帝王之道廣粵舍身與毀像兮蚩梁周之擾攘遵回洲

而展轉兮駐雙轅于河口鑿弋溪之皎鏡兮攀上饒之
衰柳美沈侯之填撫兮紹嘉會之撫綏匪形勝之獨長
兮智謀定而不疑旅人勞乎道長兮歲將盡而又雪厯
玉山之逶迤始艱難而望浙昔康樂之剖符此屐杖之
所經匪吾人之獨游誦遺詠以自甯于是距陸情畢汎
舸務閒引睇姑蔑回眄常山望陂陀激潺湲女涓持楫
吳絳攬牽容與中流歌吹清川嘲深源之書空誕王質
之遇仙渡衢州之浮橋兮聞鼙鼓之猶警豈堅城之縈
帶兮坐解圍其亦幸余聞侍郎之言兵兮謂衢專乎杭
扼今來覽其向背兮懼茲言之理隔徒斂兵而乘城兮

將浮舟而徑濟儻舍嚴而忘鎖兮懼貽悔于來事眺龍
邱而弄激兮趨建德而未攏入嚴瀨而擊汰兮峰駢疊
以峭聳緬房宗之高名昔俱躋于百里不遭會以自達
兮終淹頓而莫紀信卑位之寡績兮樂飛遁以在山企
子陵之幽棲兮道沖澹而無干任治亂之迭運兮豈妨
余之垂綸戒阿諛之絕領兮實片言而箴官守故態而
無渝兮焉屈志之足云人自尊其天子兮余猶視乎故
人何太史之管窺謂上感乎天文眇寒江而喟然兮夜
獨寐而誰言明晨謁于桐君兮冰雪清兮崢嶸過戴山
而乘輿兮感寒林之無鷲諷前哲之所賦兮聽猿猩于

茲岸雖託物以寄哀兮非斯邦之所產惟荒林之如昔
兮引余舟于富春懿吳皇之矯手兮識興廢之由人涉
漁浦而宵濟兮無野老之望北縱逸棹以超越兮及浙
江之安流歲旣改情亦倦兮吳山趾兮且息游名都之
廣達兮感高墉與阨室情與貧其相躡兮甯佳麗之足
夸參元會之盛宴兮欽軒輶之食蔬望虎林與鳳皇兮
先聖皇之省方隆巡狩而纘禹兮儼六龍而高驤嘉民
物之阜康兮曾百年之全盛行宮館其已荒兮矧王謝
之舊巷仰聲靈終不譏兮猶艸萋乎

御碑訪故宋之殿闕兮宜黍稷之離離若知富貴之必

銷兮盜早靜以處沖思林逋之窈窕兮曾不爲衰盛而異同瞻周城之靡迤兮疑陳亮之欲灌表岷山以洩流兮亦龍盤而蛇貫宋南渡之遷依負海隅以爲京賴江淮之委輸雖失勢而可疆彼天命之豈改卜人心之未忘痛弱主之荒怠苟旦夕而要盟古夷狄之薦侵專窺內之瑕釁度力爭之難取姑取和以徐診敵計窮而乞和胡惟蕙而不察徒澳忍以臨位俾義勇之氣閉與束手以割地毋甯敗而失之與增幣以齎糧曷姑棄以爲軍貲君俯張而神索民怨憤而心離卒自壞其家居亦誰爲之流涕余觀乎宋宗之方播蕩也身顛貼于幽虜

茹餘毒而渡江知非戰不足以自立非將不可與圖功
故猶推轂授鉞夢想頗牧寄權閫外號召巖谷立百年
之基膺十世之錄旣分割而小康樂宮闕之淡居目不
覩鋒刃之苦耳不聞切直之謨故甘以臣姪之空號易
聲色之實娛故四將喋血而不足一相搖舌而有餘而
當世詞賦之士人自謂枚馬之徒猶相與夸錢唐之形
勝豔西湖之歌舞不亦慎乎處約資于陰謀忍詬貴于
自彊觀句踐之石室猶前沈而後揚何趙構之無恥攤
天下而自喪滋和戰之紛紛余至今爲慨慷悼錢王之
英姿獨奮武以應敵歷千年之茗茗空靡曼以文飾豈

東南之寶盡兮曾不見乎褚陶傾邵叟之雅望兮託雉
堦以內交甯土風之清嘉兮獨莊嶽之一辭感菁莪于
沚陵兮汎楊舟而奚繼吾旣無可裴回兮遂揚帆于石
門式趙相之舊宅兮及宣公之里闡泊由拳而弔嚴兮
想文章之遇主選高風其已微兮慟詞人于千古瀝柏
尊之餘醪兮澆劉生之古土寒鷗厲而雲陰兮登高橋
而平望觀長行之蓺桑兮緬前修而增悵昔邠女之微
行兮子輿亦稱乎牆下惟五十之見資兮甯耀美于纂
組嘅被服之纖靡兮徒炫靚以藻江婦休蠶而修容兮
僅貧女之趨工氓重困于稅斂兮男棄鋤而操杼旣靡

財而悔注兮又傷農而害女苟以粟而易帛兮將百石
而一襲訊返侈而崇滄兮願拔桑而植稷儀文正之治
蘇兮想韋白之清靜渡閩門之飛閣兮發吳趨之高詠
美哉此邦誠東南之文苑也就余所聞已蔥蒨于篇卷
矣若夫顧陸之族張范之望米沈高楊之風姿篇章書
畫之談踴信彌代之多賢惜縞紵之無訪游願園而長
歎稱季野而抗手周覽既倦乃登虎阜撫五人之碑抔
要離之士坐生公之講石窺靈巖之洞戶惟蘇杭之蘇
富兮總財賦于東南矧西湖與茲北兮冠名勝于古今
曷臺榭之傾崩兮淒滿目兮蕭索知物力之已窮兮雖

信美而非樂，悵盤桓而出宿。兮望江波而感胥心，褊悵以對楚謀。陰猥以亂吳，嗟薦諸而招韜。甯進賢之爲國，將申憤而恣慾。晚獻忠其奚益，哀夫差之驕矜。羌捕蟬而忘雀，忠抉目而猶懸。死掩面其安託，指高臺之嗟峨。兮麋鹿游其曾顛，怙驕功而好諂。兮施與旦其偶然，惜初業之鮮終。兮豈存亾之怨天，天與人其相推。兮治與亂其誰宰，眇吾身之隨遇。兮怨無涯于涉海，望惠山之夜秀。兮欲酌泉而路絕，指交道之發弩。兮傳揚彪之守錫，過蘭陵而慕蕭。何一門之多材，文人非帝王之器。貴盛爲爭奪之階，卒同氣而推刃。覆社稷而爲灰，指北顧

而遙歎停舟陽而遲回尋漕渠之通津已涓涓而絕流
悲轉漕之勞費兮懼天京之無蓄噫神禹之營翼兮詎
焦思于通貢空仰食其必困兮俾榦弱而外重昔聖道
之論財貴生眾而食寡明都燕而因循兮反託命于賈
魯我

憲皇之邈思兮爰講咨于溝洫臣覩費而告難兮終鮮
裨于民食民既不足與慮始兮國亦絀于糜財懷鄭白
而興歌兮假時日其儻能勉詰屈于窮瀆兮晒鰕鮓之
游潦出越口而揚舫兮譬吾志之不小焦山既無淹薄
兮歷邵湖而懷謝賦廣陵之蕪城兮永蕭條夫何故余

素慕彼清貞兮，橫露筋之荒祠。女杖節于顛沛兮，固剛士之所師。倦歷覽于江北兮，憑壯心于淮安。弔韓王之乞食兮，知一飯之實難。儼長大而受侮兮，宛螻屈于泥塗。忽嵯峨而登壇兮，矯龍驤于高衢。始帶劍以游里兮，慚不耻于市。侮胡執珪而分國兮，仰自恥于噲伍。人生屈申于知己兮，惜漢祖之難託。要割地而後會兮，亦英慮之一錯。西循淮而需沙兮，尋黃泗之合流。慨水勢之變易兮，悲涸運于沈攸。望朔塗而迴深兮，告涼野之險艱。息金城而愬飢兮，始詰蹶于一餐。轅嬴牽綴而輪傾兮，嘆執御之非正。入方箱而盤跚兮，奚伏軾之爲敬。初

一宿于重興兮考古鎮于桃園臨崇河而迷道兮詠思
歸之曩篇過仰化至順河兮弔鍾吾之虐國想宿民之
波蕩兮何今亂之甚昔壯重瞳之暴興實奮迹于下相
藉八千之剽銳遂凜凜而渡江噫南師之攻北今古謂
其異強惟英王之剛仁勝百戰而自王成與敗其皆時
甯范謀之必臧據雄圖而自芻詎關隴之足良乘全力
而授人獨感涕而浪浪望峒岵而停驂想唐暉之窺徐
出沂泗以扇淮重防禦於百夫發紅埠而聞戒夕奄越
于郟城遑求古而問官哀瘠國之將傾覽衢膈之報荆
兮慕二于之平淩影塵纓以隼逝兮負何生之英說今

分疆自列省兮此徐沂之知割既犬身之不交又雞棲
之連瘵余踈踈此鞠道兮侯視咫尺而若荒愴魁盜以斷
旅兮塞夷庚以披昌符節反而假道兮候猾慙而稽顙
辱羣儒以溺冠兮何所乞之杪苾懣吾叱馭而驅之恥
惡木之余景憤皇路之遂塞兮宜豎子之鼠王固亂流
以何窮兮習蒼禮以自飭訪朝典于子雍昭南學于牖
日步清林而騁望兮馬陵縣而余睇謝由吾以不暇兮
將佻佻而未已出郟東而四觀兮感苾苾而初過尋曹
劉之戰地兮獨昏鴉之余詫趨李莊而飲流徑蘭山之
新縣覽琅邪之古城懷汲生之治郡稱高門于吾宗導

太保之波瀾蘊忠孝以佐時驥龍虎而藻翔雄宋祖之
復青燿南師其於鏖今究曹其淪胥何兵備之自弱刈
郟稻于開陽宿青駝而莖粟傷壞道之瀉湍勞余思于
轉轂逗塚莊而斜趨方一愒于古晉過東蒙而未登馳
顛臾之舊甸堂阜幽荒而寂寥兮頌鮑叔之薦賢固桓
公之忘讐亦仲父之善權信無競之在人貴倚任之實
專感君臣之至斯良萬古之所難逮夫子之聞政遂發
響于龜山屈聖哲于亂世豈匏瓜之自縣若乃經敖陽
越新甫亂羊流望梁父塵曠暖以截路石輪囷而隆土
始峰嶂之疊隱覺心目之異覩蓋神斂于岱宗默眾奇

之有聚覽往籍以騰迅意猶小乎天下穹窿兮崔嵬信
廣大之載敦忽虹翕而電闕將雲胚而雷胎于時長騰
櫛溱白日半開昏光四陰元精孤體乃見泰山端然于
天地之中坐受羣山之朝匪峭峻而夔崇羌渾渾而若
茗旁蜿蜒而蟠挈已培塿其嶮巖勢崩角以屈伏猶未
到而氣消神哉斯山宜專名矣若夫荊州之南有山九
千仞其名曰衡奎乎宅于明都惟余昔游于霍宮其體
大而氣尊負青天以盤雄冠千萬而首出旁岌業猶未
甯虔烈烈如武湯燮萬邦而清明於今乃見堯舜之揖
讓垂衣裳而化成以心見萬物而莫之敢京育生氣兮

浦濩鎮乾坤而奠平永託中而御樞爲四岳之所兄七十二帝倚以爲通天之臺惟

仁皇及

高宗駕百靈以東來圖明堂于神郊受昊命而燔柴陋
薄躬之不逢稱典引其靡能錄第伯之儀章躋十宮而
晨起彼雞鳴而虎步吾固須乎邛友辭奉高而望嶽勢
百里而猶走巖風鳴而金縱若虬闕乎我後出長城而
崎嶇景旣夢而又想濟南秀兮層山雲縹緲而可掌入
長清之北疆轆佃臺與張夏稽石窳之故邑嘉造次之
嫺雅盧城廢而高亾知世族之難恃博陽都而田敗信

建國之失紀輪甗鑿以困車聞茲路之債驂警風沙之
殺馬越險隘而跛廵投杜廟而始秣渡潔橋而訪沛濁
河盛而奪清豈消長之在否流汎衍而殃農兮歲浮民
以爲魚憤佞臣之委隨兮謂毗力之自渠今五載而橫
暴徒灾邦而蹙國咨窮黎之遭衰又兵旱之靡孑傾國
本以欺天兮甘諂蒞而厲今傷肺石之無聽兮對羸老
而淫淫抵耿濟而懷奔通道厖而廢戍過晏城而景嬰
愧狐裘之華嫖賦北門而仕暗尙何君之能顯悲陳鮑
之乘除賴晦德而獲免踐馬頰之絕津顧禹城以銘功
懷播河而終湮恐神變之屢窮奚李銳之淩邊淪平縣

於洪濤橫四戰之衝達紐南北之樞杓何三河之豪健
兮今直爲此靡曼也豈傑俠之沈蹟兮固漸政以自誕
也齊謳急而弭張兮胡民俗之無恥嗟四維之陵遲蓋
上教之失禮曲陸臨于河涯兮願覽古于平原保窮城
以螳拒兮操卷甲以破袁昔曹公之論兵兮謂道御無
不可乃紹尙之乘勢兮卒堅深而自墜羣鶚峙而鷹鷂
兮貴多算而待時皇棄險以資人兮仗太阿其倒持今
雄衝唯德州兮尤上京之吭噙控齊趙若要膺兮彼南
漕之所歷在唐明而爭衡兮有顏守而棟攻鑿近事于
馮李兮幾蛇食乎上邦疇典城而蕭蕭兮車入疆而若

虛疑神州之衛單兮又牧令之荒蕪出劉廟之通達兮
想侍中之治厯測歲實于斗分兮亦疇人之所則哺停
鞍于故舊嘉亞夫之受封欽世宗之善任平七國而告
功景撤著以慢賢反咎色于怏怏不遺老以輔少徒媚
功而失賞壯存審之破梁捍河北以歸晉慍束手而割
燕不一載而受釁天命不可以妄干猾夏不可以久忍
經逆豫之故邑呼徽欽而歎憫致庸夫之微位知八柄
之久殞雖凶醜之自僵墮皇綱而夷晒過富莊而濟泮
赴交河以吞聲接滹沱之尾流愁春澌之欲冰念共人
之安處董遇時而陳策投舊鄭而揖邢懷高材之仕北

怨公車之不徵將銜玉而媚工勞千土以並馳恍三閭
之難逢旣而晚于商林倦而有夢見若裊衣峩冠之徒
揖讓而進者數十人如知余之所愠乃稱古以曉今謂
賢智之奔命譬蓬轉而趨風故孔席不煖墨突不黔彭
聃最逸晚投流沙且南北之遷羈猶歷冬之有夏張衡
愁于河閒毛萇老于田家壽王暫申而俄摧先伯久約
而長嗟允被史荆熊授經窮蓋獻王之好儒僅間世而
一榮汝何媵而自矯羌獨怨于此役持布鼓而鳴雷睨
燕士而見忽假夢爽而告余醒嗒焉而忘送明甄轡而
虔恭鈴雍雍而徐動彼羣雄之馳騫固匪余之所睨茲

賢達之朽榮亦隨化而余位過任邱而辭趙追樂生之
入燕渡連橋而宛轉寫澂空于滄漣聊舒襟而一娛兮
若游泳于故川悲貧漁之凍卷兮樂操罟于湘壩尋易
京之故塹兮哀恃險于百樓三百萬穀其委人何政事
之不脩功橫絕而驚人猶震怖夫季龍苟乘疆而善守
亦何國之敢兵慟燕州之一陷故華亂而夷興吁中國
之制外惟尺地之必矜允著蔡于百王尤勞思于柴宗
蓋夷括機以伺便盜燎原以逞心盜近輦而尙淺夷叩
關而已澗苟一失其樞機聖欲收而不勝此明成祖遠

略而都燕

章皇循而至今也遵畿南而嘽嘽薄固安而已暮瀕桑
乾而涉凌欲卸車而聊佇嘉茂先之博物仰三台之離
處雖韜文而抱忠曰定傾之匪裕危勁草于衝飈竟隕
霜于幽路駭長星之耀威稜豈污乎天度僕貪涉而兼
進又夕趨于榆堡行悵悵而亾朋陰林樹之弭月惜廣
漢之久無野桴鼓而時發詎京兆之難治患權滯而官
闕野叟老而知政又告余以秉鈞想乾雍之隆規悼余
生之不辰勞與悲其有涯今懷古其無垠顧方圓之異
投願趣變而驚人霑蘇露而旁皇夜不寐以向晨誦魚
藻于在鎬乃肅容于

帝聞旣邦畿之知止解余驂而偃輪念班氏之有作雖
不敏而願遵壯潘生之抽思意疊疊而成文若夫說山
川賦京都徵昔獻揚鴻謨非勞者之所歌將詞達而義
誣獨杼袖于余懷冀因事而託諷憑朔風而優焉鬱幽
篁而終詠粵梁鴻之五噫誠聖漢之所求召賈誼于洛
陽匪事勢其曷誼諒抱慚于一子託文詞以優游恐薄
旅之終棄藉曠覽以寫憂

會試萍始生賦

有一佳人之當春兮蘊遙心于曾瀾澹融融不自持兮
又東風之無端何浮萍之娟娟兮寫明漪而帶寒隱文

藻與冰泮兮若孽秀之可餐苟余情其信芳兮豈猶媚
此香蓀覽生意之菲菲兮蓋漾影而未安退靜理夫化
始兮悵結帶以盤桓夫其輕霜夕零流澌稍上涵雁別
羣孤鷗辭浪眇遠思而凌波闕寒泉而增悵遲榮華於
初歲各含性而相向極千里而懷春始臨江而一望彼
隨流而靡傾悅芳碧于新漲微根萌而已孤懼飄泊而
無傍愧薄弱之易生敢希惠於和暢因熙陽之潛通始
寥落其如星旋引蔓而相牽雖少蒂而自榮映水痕而
微綠借遠山之餘青縈桂楫而暫開迺無心而合并信
難進而易退若將流而更停挹芬苴而見遺謂瑣細之

無成荷太液之餘潤尙何歎乎浮生昔季蘭之齊絜詠
南瀕而徐步比清真於芳春塞不怨此遲暮生無微而
不遂在始節之自固儻緣竿而隨緡終見棄於中路願
容與于平流任風濤之所遇浮江海而不沈游清濁而
無忤豈汎汎以全軀惟依依以保素奚自感其飄零云
華季之易度亮生機之不息幸懷新以代故奉甘實于
哲王庶無譏于落瓠託蒞藻之忠信豈徒閱夫時序

咸豐十年會試天下舉人

天子命大學士周祖培爲正總裁官二場試五經義至
禮記獨發此萍始生一句案其義例說數十言因

明白矣而功令限三百字以外乃作賦一篇又禁

挾片紙不得錄彙既黜落領卷故題爲會試賦云

牽牛花賦

并序

牽牛花者蔓生蒙籠不任盆盎之玩待曉露而花見
朝日而蔦雖無終朝之榮而有連月之華豪貴之士
將晡而起終莫能覩也湘綺樓前往架植一叢花時
侵晨對婦曉妝乘露簪鬢明麗清豔蓋名花五色翠
碧爲絕胎於初秋應靈匹之期故受名矣又采花浸
泉爲染薑梅備尊俎之薦案考圖譜長沙又謂之薑
花是也予忝歲游京師寓愍忠寺南寮此花娟然雜

於蔓草今秋在祁門軍屯城西荒垣舊井閒叢發萬
藥而賞心寂寥莫能一顧客居涼獨頗乏攜手之觀
彌思故園知其孤秀譬猶幽蘭之芳不謝於無人萋
楚之華豈樂於無配也嗟夫自我不見於今三年雖
非淮橘不遷之情又懷漢柳今移之恨物微感多遂
賦之云爾

余旣悅幼服之恆榦樹蘭蕙於畝畹惟茲秀之緣延蔓
總翠於苔本感佳秋而微芬孕麗容於藍琬邊旋醜而
如覆澹白迤而遞管葉柔絲以就握趺承風而款款逗
殘星而始碧浥濃露而愈婉冠容媚以獨世何紅紫之

足浣至其遺芳抱珍託素無凋既當春而彌退乃避
而自脩夜幽寒而益潔秋深靚而若憂乘天地之復清
練新情於窈慟厭人生之浮榮物競曉而獨收信運化
之不凝曾不可乎或留葵傾曦而已勞蒲聞花而無迹
非清士之厲操豈充玩於朝夕美人媚而欲采蓋斂望
其空惻俗奚慕乎不見諒無得而彊惜當淑子之晨妝
惜秋窗之旦開色曖曖其初分澄桂苑之明苔襲羅襟
而薄涼朦豔影其臨階依翠鬢以鮮芳恨將別於瑤釵
既恆賞其娟娟傍零露而摘腴飭齊敬於明發悅初英
之未渝勞玉手以承華華的的其在裾素盤潤於清泉

澹紅影其如虛點薑梅而相瑩又芳蘊而盈孟配蘇藻
以羞神及仙隱之嘉蔬何舜華之足榮徒日暮以跼蹐
惟斯質之余美儷同心而增眷秋無期於遙方爰應節
而自見桂留人於他山非余懷之所繼寒獨影而難竚
雲河低而已轉翮翠衣其將從若玉階之余媛念緇塵
之不淄曾三宿而余戀委幽顏於下國將惆悵於理賤
謫哈密瓜賦 并序

哈密瓜貢自西域登于

玉筵非近貴大臣莫得受

賜其名震於本朝通于四海文人詠頌以得嘗爲幸誇

其鄉里者蓋不可紀余以公車留於京師從故大學士第中與分半蒂又山東巡撫見餉一枚深求其味玩其香色至五六日旬時矣既歸鄉并因暑盛削瓜追思其事恐後之迷者隨俗而稱方今天下多事夷狄侵陵若道不由庚此瓜將蒙竊嘉號遂作賦嘲之

其詞曰

漢武皇帝既席盛業功德淳沸冠於禹湯乃作上林苑三百餘里珍木瓊果載籍之所不述者駢闐排闥萬樹一行辛有南越之桂苦有蜀蒟之醬甘有王母之桃酸有蒲桃之漿五味淫溢滌醒解涼方朔不得竊樂大不

敢嘗乃以夏日避暑建章使大官進冰尙食副瓜絺巾
既撤玉盤方舉帝色有不懌召上林丞榜之一百趣召
博望求於西域役死者數萬得瓜一石橐佗負載千里
一息至於御前蒂尙未黑水若浮瓠刀若畫雪香散四
坐味已入咽甜若嚼霜爽而無屑寒若照膽鏡肝肺灑
灑煩豁氛靜其品第一羣臣見者皆呼萬歲議功立名
因帝寵嘉越來自西以謚此瓜三千年後徧於四遐有
東有南望塵奔爬中國聖地長養精華燉煌故邦產無
餘祖逮我

神清受命化覆無外漢之絕徼曾不出砌於是隴山博

士論瓜之黨有逃於發機者游於夷中好爲游說稱道
瓜美以風夷類椎髻高鼻深目醜種習

皇帝之仁義棄弓戟而荷耒耨耒率其婦子種壅耘溉以
博士狃於溫谷欲救其敗故瓜熟必十月然後入內名
從主人號曰哈密如野獻芹口慘鼻齜而

皇帝受之以柔遠國時賜近臣以示來遠物而已爾其
爲狀則猥瑣宛轉擁僮卷曲墮似敗絮重贅多肉皮則
不堅不柔非青非綠以爲黃臚又不可熟瓠則甜比敗
蜜厥氣生腥榨之無漿含之不冰黏滯輒烈狀譬膠錫
圃中南瓜正可爲兄曾不自恥而貢於京則有膏梁餘

子食無正味問其地產而轉自相貴乞分十一爰祭爰
餽或田舍諸生官若侏儒榮其得賜懷持歸家反復疊
傳曾不敢咀黑腐敗壞猶欲爲菹又安敢毀譽乎夫名
價高族依託附屬沙漠朽壤敗土礲确藤蔓牽引鉤帶
樛葛習慣僻陋偏起阡陌罷牛憊馬籠挂繩絡車仄擔
踣因緣而進者家家以爲隨珠人人忘其魚目或葉底
瘠萎糞土未除髦酋上疏薦登御廚他國劣種微感地
氣同車而進不蹕而至而狂穉昏蒙輕薄之士望風承
旨揆頭側耳搖脣嚼齒尻高足痺目未及見舌未及舐
手未及捫口說其美使老圃迷惑婦子咨嗟楛樓入土

匏瓜渡河東陵故侯矧敢疵瑕瓜乎瓜乎不亦過乎若
一旦

天子彈五弦之琴求解溫除渴之用玉盃金刀以待苞
貢則此瓜將永屏塞外爲田夫所羞種泣而自責愧而
入甕

湘綺樓文集卷第一

桂陽陳兆奎校刊